

Sujet:

Aaleege - Aaliege

**I bii vergniegt dur d Staine gloffe,
ufaimool haani aine droffe,
dää haan i no vo friener kennt.**

**Mer sinn als zämme ummegrennt
in unsre alte Kinderdaage
und hänn enand der Grind
verschlaage
und allerhand verruggti Sache,
he joo, was Bueben eso mache.**

**Jetzt simmer elter woorde, ryffer.
Äär isch e Wäägeler, yych Pfyffer.
Und fir das Zämmedräffe z fyre
diemer der bruuni Mutz aastyre.
Mer fraien is, enander z see,
yych nimm e Bächer, äär e Thee.
Aber won i froog, wie s goot,
wird er um d Naasen umme root.
I haa der Ydrugg, er syg grangg,
do maint er: "Yych schaff uff der
Bangg."**

**Und im näggschte Augeblig
sait er: "S goot mer nit so digg.
I haa im Lääbe mängs brobiert,
haa an der Beerse spegguliert,
daas het e Wyyli funggzioniert,
der Gwinn, dä haan i inveschtiert,
in kurzer Zyt e Huffe Gäld,
in Hedsch Fönds uf der ganze
Wält."**

**"Henu," und "Gsundhait," haan i
gsait,
"Das deent jo naimeduure gfrait,
de kunnsch au guet grangschiert
derhäär,
worum nimmsch s Lääbe denn so
schwäär?"**

**E schiggi Schaale, scheeni Schue,
syg doch zfriide und gib Rue."**

**Äär luegt mi iiber d Dassen aa
und sait: "I leeg jo alles aa,
Hemml, Hoose, Huet und Kittel,
Schmugg, Juweele, andri Mittel,
Utensilie und Täggschtilie,
Aggzie, Gold und Immobilie,
alles haan i inveschtiert
und im Ghaime guet parkiert
imme dieffe Käller unde.
Und jetzt isch das Zyyg
verschwunde.**

**Eb Cayman-Insle, eb s Davos isch,
i waiss aifach nimme, woo s isch."**

**Doo druff saag i: "Gobbeletti,
wiirgglig, dyyni Soorge wetti!
Statt aaleege duesch aaliege,
d Wooret duesch der zämmebiege,
alles undere Naagel ryses,
und alli andere duesch bschyses.
Soo wird aaglegt zue aaglooge.
Schämm di! Oder hesch no
Frooge?"**

